




a cura di Isabella Descalzo

Monica Bruzzone, *Una storia di uomini e di passione sportiva. Aragno 1946-2016*, A.S.D. G.S. Aragno, Genova 2016, pagg. 112

Monica Bruzzone, *Che Nervi! Piccole storie di pallanuoto e altre storie più grandi (1957-1977)*, Sagep Editori, Genova 2017, pagg. 112

A pascion sportiva, e in particulâ quella pe-a palanêuo, a l'é o tema de questi doî libbri. O primmo o conta a stôia da sociêtæ Aragno de Pra, ch'a dua ancon òua inta piscinn-a costroia in sciâ "fascia de rispètt", in pö a refæta da bèlla spiâgia aröba da-o pòrto. O segundo o ne pòrta pròpio a l'atra estremitæ de Zena, a Nèrvi, dove pe contra a piscinn-a a l'é da anni in dezarmo, dòppo avéi òspitòu tanti alenamenti e gare de 'na squaddra arivâ in serie A e pöi purtròppo falîa. L'é cangiòu i tenpi, da quande se zugava in mâ co-o balon de chêuio e tutto o quartê, a Pra e a Nèrvi, o l'anava a fâghe o tifo: òua gh'é fòscia ciù palanche, ciù comoditæ, ma meno pascion pe 'n zeugo ben ben fadigozo. Tanti se riconosciàn ò rivediàn parenti e amixi inte fotografie de squaddre.



Dino B. Bergaglio, *Arlie, Città del silenzio* Edizioni, Novi Ligure 2017, pagg. 208

E arlê en, comme dixè o sototitolo, "scimilitudini, provèrbi, mòddi de dí, desligaléngoa e credense popolari de la da-i Zòvi", l'é a dí into teritòio da Republica de Zena, e defæti s'asoméggian ben ben a quelli do versante de sa. L'aotô, apascionòu da stôia locale, o l'à recheugéiti e trascritti into dialetto de Tascereu, ma o dixè ch'en pægi anche, pe dí, a Seravalle ò a Neuve. Provèrbi e mòddi de dí en divizi secondo l'argomento e sotta a ògnidun gh'é a traduçion leterale in italian, pe façilitane a comprension. In fondo a-o libbro gh'é i desligalengoa e pöi, inte ùrtime dexe pàgine, e credense e usanse popolari.



Olindo Zingariello, *Il Cerchio è Chiuso?*, Edizioni Araldica, Genova 2017, pagg. 276

L'aotô o dixè d'avéi ritrovòu inte 'n vegio comò di aponti ch'o l'àiva pigiòu 'na dêxenn-a d'anni primma, pensando de scrive in romanzo. Aloa o s'é fæto coraggio e, co-a penna avua in regalo pe-a Primma Comenion, destinâ a grende inpréize, o l'à comensòu a mette zu e idee de maniman che ghe vegnìvan, finn-a a completâ a trama, e pöi, a son de rivedde, cangiâ e rifinî, l'é vegnuo feua questo libbro, ch'o l'é 'n romanzo in pö reuza e in pö giano, ambientòu tra Zena e New York. O l'é scritto bèllo gròsso, ch'o se leze ben, e in fondo gh'é e fotografie a colori de tanti pòsti reciamæ into raconto.

